



Rabu, 27 Maret 2024

Ogen : Perbahanen Rasul 7:54-60



*Njidadah Sinalsal Tuhan I bas Kiniseran*



**S**ekatan ngidah kiniseran Jesus i gasgasi, igudami, ipakuken, iisak-isakken kalak seh ku bas kematenNa guna keselamatan doni enda, passion e pe ertina ndalani kiniseran erkiteken empertahanken kiniteken ras ngikutken Jesus.

Istepanus sekalak diaken si terpilih tupung rasul-rasul mindo teman si nampati ia i bas ngelai perpulungen. Kenca terpilih, Istepanus idemi Kesah si Badia. Ia pang ersaksi kerna Jesus si enggo mate erkiteken dosa manusia tapi enggo keke i bas si mate nari, nangkih ku surga. IA me raja i surga ras i doni. Erkiteken kesaksinna e Istepanus itangkap, ibaba ku pengadilen Agama. I bas pengadilen Agama pe tetap ia ngerana kerna kata Dibata. Megelut kalak si i bas persidangan e, merawa kal atena ngenehen Istepanus. Tupung itatapna ku datas iidahna sinalsal terang Dibata ras Jesus tedis arah kemuhen Dibata. Kai si idahna e iturikenna man kalak e kerina. Megi perkatanna e reh segatna ate peserta sidang e, termasuk pemerintah romawi, ras guru-guru agama kalak Jahudi. Perbahan si e iserbuna Istepanus, isarenna ku darat kuta je nari, ibenterina alu batu. I bas kiniseran Istepanus sempat denga ia ertoto bagi pertoton Tuhan Jesus, nina, "O Tuhan Jesus, alokenlah tendingu." Janahna erjimpuh nina 'ola min ikira Kam dosa kalak enda.' Enda me passion si inanami kalak Kristen. Ndalanken sura-sura Dibata si megati petembil ras sura-sura manusia. Tapi adi tetap kita erdalan bas kiniteken, amin pe melala tantangan, Kesah Si Badia lalap nampati. Sinalsal Tuhan e nuduhkan maka labo kita si sada, Tuhan lalap ras kita ras njamini keselamatannta. La aru ate amin arus ndalani kiniseran.